

國朝寶鑑卷之二十八

宣祖朝五

癸未

十六年春正月兵曹判書李珣引疾乞歸  
不許逾二旬始出謝後力陳不堪判兵之職  
且言故事典文衡之臣鮮有主兵者誠以文  
武重柄決非一人所能兼故也乞賜遞免  
上答曰故事有無不足道也我朝兵力固不  
及於前朝而昇平百年兵政之散久矣予時  
思之未嘗不隱憂而實歎不得其人焉卿嘗  
以更張改紀前後惓惓是卿之所志也卿誠

能出奇運謀革盡流弊作為養兵之規於國  
家幸矣書曰克詰戎兵劉子曰國之大事在  
祀與戎荀子曰兵大制則制天下小制則治  
隣國誠有國之不可忽也卿其努力調病行  
公亦可以治事也 上既不許適職又有北  
邊警報遂不敢復辭○二月北界藩胡作亂  
陷慶源府兵馬使李濟臣連狀告急 上初  
聞邊報引見三公及備邊司宰臣以罷散武  
臣吳法朴宣為助防將領勇士八千先赴援  
以京畿監司鄭彥信為右叅贊兼都巡察使

李獻為南道兵馬使刻期繼援國內大震既  
而慶源敗報至上以府使金璫判官梁士  
毅失守命遣宣傳官梟示軍前以振軍律傳  
教大臣曰昨與卿等面議之時或以為藩胡  
決無背叛之勢今見賊勢藩胡之叛無疑六  
鎮以胡人為藩籬雖曰其慮遠矣養成肘腋  
之變豈特時運之不幸然六鎮非藩胡之屏  
蔽則亦難為守其向國納款者當仍而撫之  
背恩忘德者當發兵致討以施一怒之威今  
不問罪懲創則他日之憂有甚於今日聲罪

薄伐蕩平其巢穴然後擇其效順者更為藩  
屏撫之以恩威亦良策也議者必曰兵連必  
曰開釁此儒生之說也未聞有叛不討而為  
國者也大臣回啓曰伏承 聖教實合時宜  
北虜凶逆如此豈可姑息不討其罪今使巡  
察使商度本道兵力及糧餉然後可行天討  
從之賊胡復圖慶源府穩城府使申砬領輕  
兵先赴援入城賊圍之三匝砬兵殊死戰賊  
遂退去賊又圍乾原堡富寧府使金義賢力  
戰却之賊又寇安原堡兵勢甚盛守將皆無

固志申砭方援阿山路經安原見有越城以  
逃者即斬之懸於旗竿以定軍心賊知之不  
敢犯而退賊又圍訓我鎮作衝橋四面攻城  
僉使申尚節晝夜拒戰矢盡力竭城將陷申  
砭與柔遠僉使李璞從黃栢坡間道直馳突  
圍以入以一箭射殪賊酋胡人識砭面者相  
驚曰穩城令公也揮弓而退尚節亦開門出  
擊與砭乘銳追賊擊斬七十級直擣其部落  
焚穹廬而還是時慶源鍾城會寧等鎮藩胡  
皆叛獨穩城胡不叛盖服砭武勇也砭常時

練鐵騎五百餘名校獵習戰沿江馳突捷疾如神胡人皆聚觀之時昇平日久兵不知戰但守埤放矢如射帷然賊或肉薄登城則皆恒惑不能發矢及見砮接刃搏戰戰比有功邊兵始奮勵乃敢野戰擊賊得保守六鎮由砮倡勇也○兵曹判書李珣入對陳時務六條一曰任賢能二曰養軍民三曰足財用四曰固藩屏五曰備戰馬六曰明教化上下其章于備邊司曰此疏辭為國之誠至矣予亦有一言以蔽之曰上自公卿下至士大夫

不為關節簡請之私則可無為而治矣其所  
謂任賢能在此養軍民在此足財用在此固  
藩屏在此備戰馬在此明教化在此不然良  
法美意更無所施而雖日更舊法恐其無益  
徒自勞耳○北兵使李濟臣分遣諸將討叛  
胡穩城府使申砬富寧府使金義賢僉使申  
尚節及軍官金遇秋李宗仁金浚民等分三  
路渡江掩擊金得灘安豆里者中島麻田塢  
尚加巖于乙其車汝邑浦多通介洞諸部巢  
窟焚其糧械積聚斬首三百餘級全軍而還

捷奏

上教備邊司曰予固知李濟臣且如

此衆皆非之予亦不能自守今者既已立功

拿鞠未穩其議處之

先是兩司以濟臣陷城辱國啓請拿鞠

○

閏月兵曹判書李珥入侍朝講仍啓曰臣欲

陳所懷而經筵則講書後啓事殿坐日晏請

於燕閑之時賜對盡言

上許之於是入侍

臺臣司諫權克智掌令黃暹等啓曰李珥若

有所達之事當於經筵進啓若朝講入侍人

多不得從容進啓則或於晝夕講啓達無所

不可也今若無時請對則慮有後弊而臣其

時入侍未及糾正請逋臣職答曰爾等欲使  
君臣阻隔心術可知不意今者有如此之人  
也可勿辭諫院請克智等出仕 上曰此人  
可逋不可出也再啓乃允珥後上疏乞逋略  
曰臣言輕謀淺大拂羣情一議纔數百謗輒  
隨用是志勤效遠身勞職廢爵位徒隆寵命  
祗辱臣非木石寧不知恥嗚呼 殿下之為  
國不亦難乎民失恒心兵擁虛器內則儲蓄  
罄竭外則金革連結士論渙散紀綱陵夷因  
循則束手待亡變通則衆目駭異若非豪傑

之才聖賢之學出為世用挽回世道則雖以  
殿下之睿智無救於土崩之勢矣臣於此時  
以弱植孤根棲棲其間乃欲匡主而救民其  
亦不自量矣頃日權克智黃暹之說則只拘  
俗見豈有他心黃暹則臣相知未熟克智則  
是臣族黨熟知為人保無壅蔽之邪意矣  
殿下折之太嚴此尤小臣重得罪於公議者  
也臣進退路窮觸事生病入則髮白心焦出  
則笑罵盈路知臣之情者孰不悲憐哉臣又  
覆思之得一策焉傳曰不信乎朋友不獲乎

上矣今臣之違衆招譏者由臣學力未充不能見信於人故也臣自還朝專廢學業志氣怠荒見識茅塞馴致枯亡則將為棄人如得數年之閑更得用力於操存省察之地以立根本然後還事聖主竭誠盡才則必不至如今日之齟齬矣上優旨不許即命引見

○三月兵曹判書李珥上疏極陳時事其疏曰伏以興亡有漸治亂有幾先事而言則多不見信事至而言則欲救無及臣讀前史每於張九齡成忠之說未嘗不掩卷深吁不能

為懷也嗚呼義慈之昏庸固不足道玄宗之  
明智亦昧先見不用之悔曲江之祭何補於  
亂亡哉自古亂亡之國或以淫虐暴絕天命  
或以積衰委靡不振臧穀雖殊其亡一也一  
也然淫虐之病猝發於一時若賢君代之則  
可以按古而易於復興積衰之證醞釀於累  
葉雖哲王受之倍用其功而難於振起我國  
家積德累仁根本固深而百有年來俊乂不  
售其才疵政日加於民自燕山顛覆典刑之  
後無人釐正朝廷與百姓相忘者厥惟久矣

嗷嗷赤子常在水火之中籲呼無聞雖無外  
寇其勢固已岌岌矣況今北胡啓釁兵連禍  
結欲援則國少控弦欲餉則倉無宿儲緩之  
則慢弛不集急之則潰散為盜亂亡之象昭  
在目前此非先事之言也無乃近於欲救無  
及者乎嗚呼殆哉嗚呼殆哉雖然豈可付之  
無可奈何而束手待亡乎竊惟天下之事有  
本有末先治其本者似迂而有成只事其末  
者似切而反害以今日之事言之和朝廷而  
革弊政者其本也調兵食而固防備者其末

也末固可舉而本當尤先昔者鄒魯之閔鄒  
民疾視長上之死而不救穆公問於孟子孟  
子不告以嚴肅軍令而乃勸行仁夫仁政非  
一朝所可猝辦也兩陣相當矢石方交雖欲  
行仁勢無及已以常情言之孰不笑其迂且  
遠哉然既無教養之素而遽加棄民之刑則  
必敗之道也寧退而修政以為後圖孟子循  
本之論豈云迂哉今之事勢實類於此殿  
下其亦反本而思之乎所謂和朝廷革弊政  
者何謂也自古為治之君必先正心以正朝

廷朝廷既正士類協和然後形和氣和而天地之和應之矣今者朝廷之不和災沴之荐臻誰任其咎無乃殿下正心誠意之學有所未至而用捨舉措之令未得其當歟伏願反躬省念無拘近小必以追踵聖王為志焉此在聖明典學力行之如何今不敢喋喋累陳焉若今朝廷則殿下以為何如耶自東西分類之後形色既立徃徃未免以同異為好惡而造言生事者交構不已縉紳之主論者多是東人所見不能無偏而其流之弊

或至於不問賢愚才否而唯以分辨東西為  
務非東者抑之斥西者揚之以此定為時論  
於是士類之初進輕銳者知發身之路在於  
攻西故爭起附會傷人才壞士習而莫之禁  
遏嗚呼東西二字本出於閭巷之俚語臣嘗  
笑其無稽豈意式至今日為患滋甚乎觀人  
之道只分邪正而已何東西之足辨乎如臣  
初非得罪於士類者也只欲調劑兩間共為  
國事而士類之不知者誤指為扶西抑東一  
被指點漸成疑阻百謗隨起終至於館學之

儒亦或輕侮揆臣分義固當乞退杜門省愆而貪戀恩寵迄未決去且念士類固過而多出於識見之差非必挾私誤事也一朝覺悟則其間儘有可用之才而間有一二人知臣本心故黽勉遲回必欲偕之同寅協恭之域嗟呼鳥獸不可與同羣臣捨士類將誰與集事乎臣之用意甚艱而情理可悲矣臣今竭言固知益忤時論而展盡底蘊如此者殿下略見形象未究實狀而近日獻言者或有斥朝紳以偏黨者若殿下未能洞燭遂疑

臣隣盡為朋黨則恐為士林無窮之累必須  
明辨而極言之且陳揅弊之策然後士林得  
安而公論得行矣自古小人固有朋黨而君  
子亦引同類若不問邪正惟黨是惡則無乃  
同心同德之士亦不得見容於朝邪是故自  
古朋黨之弊只為縉紳之疵而惡朋黨而欲  
去之者未有不至於亡人之國者也東京黨  
錮之變白馬清流之禍可不深戒乎今之縉  
紳豈無一二偏黨之習不可因此而舉疑羣  
臣也嗚呼上下未孚縉紳不睦國是靡定浮

議橫流如此而欲望戡亂制治者未之前聞  
聖明在上雖無士林之禍安知後日不測之  
變實萌於今日乎南袞沈貞寧有種乎今者  
一任士流之所為固不可也若以士流為非  
而攻之則尤不可也伏望 殿下廣召大臣  
臺侍賜對榻前明諭 聖旨俾改分辨東西  
之習陟罰臧否一循公道消融蕩滌鎮定調  
和而如有執迷不悟者則裁抑之懷私強辨  
者斥遠之必使人心所同然之公是非得為  
一時之公論士林幸甚臣數此言豈敢自以

為是哉惟 殿下載自宸衷詢及廟堂臣言  
若是則即命施行如以為非則即加罷斥使  
國是歸一無是非模糊之失則其幸尤大矣  
如是而推誠接下從諫改過 聖心既正朝  
廷既和則可議得人而革弊矣夫得人之說  
固是老儒常談而揆以實事更無他策孔子  
所謂為政在人者豈欺我哉雖然才不借於  
異代在於任用之如何耳百里奚居虞而虞  
亡子思居魯而魯削有賢而不用則與無賢  
何異哉今之議者托於得人之難每遇變通

之論若必得人如古昔聖賢然後乃可保邦  
而不得聖賢寧任危亡云爾則得人之說反  
為痼病天下之不喪其邦者幾希矣漢高之  
蕭何唐宗之魏徵宋祖之趙普此豈伊傅呂  
葛之徒乎不過取其一時之尤者耳如使三  
帝置三人而不用必待伊傅呂葛然後始欲  
為國則伊傅呂葛卒不可得而四百之業真  
觀之治天下之定無與共創者矣今之人物  
視漢唐猶且眇然況求三代之士乎如欲取  
一時之尤者則代豈乏人乎在 殿下委任

與否耳洪惟我世宗大王是東方聖主也  
用人由已立法圖治垂裕後昆永建鴻基而  
其用人之規則惟賢惟才不問其類任用既  
專讒間罔入南智出自門蔭而以黑頭拜三  
公金宗瑞顯彼物論而以獨見開六鎮超遷  
不日者意謂當至卿相而位稱其才則終身  
不改久任累年者意謂官止於此而一朝陞  
擢則不限階級此真古昔聖帝明王任賢使  
能之一揆也豈特世廟為然哉祖宗率  
由成憲雖設科舉而人才之不由科舉者多

致卿相當時不以為恠後世稱為義事未聞  
錮門蔭以限職者也門蔭尚不可錮况守道  
尚志之士不屑科舉者寧可後於決科之士  
乎頃年 殿下命復 祖宗用人之法使未  
出身者得為憲官其選必取時望故風采多  
有可觀者清議甚愜而俗見疑之 殿下不  
意還下循俗之命使 祖宗良法義意既行  
而還廢未知 殿下何為而輕變 祖宗之  
法又循流俗之見耶士類失望人才不進自  
此伊始言之豈但太息而已哉近日竒大鼎

之說有以激惱 聖衷而然耶夫廷臣曾以  
神德當祔之說仰叩丹陛者不為不久自度  
決不能回天然後遷就於建閣設官之說出  
於事勢之不得已耳非其本心也廷議既然  
則安得以一人之言輒變前說乎大鼎若不  
能以已見回衆論又不肯以衆見屈已意則  
當初宜引疾不出使無紛擾之弊而乃敢挺  
身獨斷欲使舉朝從已其亦不自量已及其  
並出之後既不許獨啓又不能改圖則謝病  
之外更無他計此則事勢之當然者也謂之

木強執滯則可也若指為詭譎則實非其情  
玉堂之分疏似不明瑩而殿下之過疑亦  
未深燭也豈可因此一事遽置而不用亦豈  
可因此一人盡廢一時之人才乎因噎廢食  
見則廢屨古今之通戒殿下其未之思乎  
嗚呼希世規進銜王求售決得失於一夫之  
目以為干祿之資者殿下之所貴也恬靜  
自守韞櫝待價不以祿位為榮而必欲不失  
其義者殿下之所賤也如使伊尹傳說呂  
尚諸葛亮之徒復作於今日則未知出於前

所稱者乎出於後所稱者乎死馬見買而得  
千里之駒郭隗為師而致國士之趨好善之  
效捷於影響方今國勢板蕩氣象愁慘雖得  
曠世之賢才亦恐不能扶持而 殿下乃與  
恬常守故之臣循例講論不革一弊不出一  
奇而輕視一時之士使之望望而去如是而  
欲望坐清邊塵撫安民生無乃近於却步而  
圖前乎伏望 殿下亟回前見復遵舊憲使  
日月之明仰見旋復而側席求賢致誠盡禮  
未至者期於必致已至者期於必用國家幸

甚今日上下皆以慶源為憂必欲得人再三  
掄擇其計至矣若一國之危無異慶源則未  
聞深思遠慮而朝廷大官及臺侍之職則不  
見難慎塞貪填闕朝除暮拜席不暇煖玩愒  
度日百度皆弛豈慶源重於一國而邊將重  
於六卿臺侍乎何不以憂慶源者憂國家乎  
虞舜之帝也不過命九官而已晉悼之霸也  
不過選六卿而已若使九官數易六卿頻遷  
則雖以虞舜之聖晉悼之賢終罔與成厥功  
矣伏望 殿下與大臣講求久任臺諫之策

而至於官人之際亦必疇咨熙載務使人器  
相稱委任責成勿貳勿間期於底績此尤幸  
之大者矣若革弊政則愚臣從前所懇在於  
改貢案改軍籍并省州縣久任監司四條耳  
改軍籍雖蒙允許而臣不敢始事者臣之初  
意軍卒之設本為防禦故欲減軍卒進貢之  
役移于田結使之閑居養力專意訓練以備  
緩急而既命不改貢案則雖改軍籍養兵之  
策必不見效古語有之利不什則不改舊若  
只有更張之虛名而不獲變通之實利則寧

仍舊而已嗚呼不改貢案則民力終不可紓  
國用終不可裕目今邊患漸棘寧息無期所  
急者兵所乏者食加賦則民困尤甚不加則  
國儲必竭况別造軍器加設禁軍等事皆出  
於不得已而經費之外調度甚廣未知出何  
異策而可補經用乎至於併省州縣則本出  
於  睿思而施行不難利害較然  殿下每  
以沿革為重事古之沿革非必大段變通也  
或分或合代不絕書此豈重難之舉乎小邑  
殘民困於繁役若一朝并數邑為一則斯民

之懽忻如解倒懸矣今以一事可見其驗黃  
州判官之革也吏民蹈舞相賀二邑為一亦  
與革判官一也不難知矣斯民憔悴訖可小  
康 殿下何不一施惠澤乎若久任監司則  
臣於前日已盡仰達而尤所汲汲者兵營之  
設於巨邑使兵使兼宰者最為今日蘇復軍  
卒之良策而先須久任監司然後始令兵使  
率眷故臣之切望在此豈是愚臣一身之計  
哉當今之策歸重於備邊故今日糾摘列邑  
之奸吏明日調發二道之僧軍命抄豪右矣

募加禁軍矣廣取武士矣此皆枝葉之謀非  
根本之計也嗚呼災害並至式日斯興人情  
驚懼罔保朝夕而朝廷之所施措了無一事  
可以仰荅天譴消弭禍萌慰悅民心鞏固邦  
本者徒使中外囂然訛言四騰臣雖竭誠仰  
瀆非一非再而殿下難於更化至今遲疑  
馴致民力益盡國計益罄邊釁益深而不堪  
塗炭之民起為盜賊遍於四境則雖有王佐  
之才亦無弘濟之術矣至此而始悔不用臣  
言何嗟及矣今之時勢譬如久病之人元氣

漸敗動輒生病治冷則熱作治熱則冷發雖  
曰外邪可防先須補養元氣元氣既復根本  
既固然後治邪之藥可以有效若不顧元氣  
只服攻擊之劑則不久而命盡矣今臣之必  
請變通者是補元氣之劑也其請調兵運糧  
而不顧變通者是只事攻擊之劑也議者或  
以騷擾為憂而不欲變通此大不然改貢案  
改軍籍省州縣等事皆自朝廷商確勘定而  
已民無升米尺布之費何與於民而有騷擾  
之患哉若量田則不能無小撓於民故必待

豐年乃可舉行貢案之改必後於量田云者  
此亦不然貢案固當以田結多寡均定矣量  
田之後田結增減豈至於大相懸絕乎先改  
貢案隨後量田亦何害哉田結雖有盈縮之  
小差豈如今之貢案不問田結多寡而率意  
誤定者乎大抵俗情樂因循而憚改作自無  
意智度人皆然故雖見危亡之象罔念扶持  
之術反以有為為騷擾無謀為鎮靜有如禁  
人服藥藏病待死此固具臣之常態不足深  
責只恨 殿下之明聖難於奮庸坐視必亡

而莫之改圖耳若 殿下悉用臣策堅持不  
變既行三年而民生不安國用不足養兵不  
如意則雖加臣以斧鉞之誅臣實甘心矣伏  
願 殿下勿以人廢言更加熟慮焉所謂調  
兵食而固防備者雖是事為之末而亦不可  
弛緩不舉也設民為兵屯田積穀廟謨已施  
其成敗利鈍不可預料倘使慶源小醜終不  
悔禍而他鎮藩胡乘時扇亂則咸鏡一道之  
力決不能支撐矣今欲發送援兵則不教之  
民勢難驅迫輸運饋餉則二千之程勢難聚

糧於此拘守常規則債事在於俄頃矣臣之  
愚計前者既發而復止到今尤無他策若用  
臣言募庶孽及公私賤有武才者使自備餼  
糧入防于南北道北道則以一期為限南道  
則以二十朔為限使應募者衆而兵曹試才  
而遣之庶孽則許通仕路賤隸則得免為良  
私賤則必本主呈單于兵曹然後乃許試  
才使無叛主之奴其代則從自願擇給如無  
武才則使之納粟于南北道以遠近定其多  
寡之數而許通從良亦如武士焉則兵食稍

可以備禦矣昔者李施愛之亂賤人輸運軍器者皆得從良庶孽從軍者得赴科舉此是世祖大王權時已行之規也臣固知此策必不合於時議而此外更無良籌故不得不更瀆也伏望 殿下深思熟計斷而行之也噫匪茹之亂作於無備勝敗安危決於呼吸而議者猶欲從容談笑徐考前規加之以衆論紛興折衷無期若待廷議之定則邊城已破矣謀夫孔多是用不集者此之謂也嗚呼無狀愚臣遭遇 聖明仰恃恩眷無少隱諱狂

言妄語前後累陳疎謀謬策十不一施孤蹤  
隻影踽踽栖栖主憂臣辱晝嗟夜唏髮白心  
爛徒勞無益陳力就列不能者止義當奉身  
退守愚分而披肝瀝血至今悲號而不知自  
止者誠以受國厚恩糜粉難酬明觀積薪之  
燃敢懷顧身之念臣不更言臣有願咎伏望  
聖明憐察採納焉荅曰予偶閱卿年前上疏  
而今卿疏適來前後惓惓深嘉卿不忘庸君  
之孤忠也國事賢大臣自當任之南行為臺  
諫既往之悔猶不可追一之已甚寧忍再誤

貢案事議于朝廷其論不一故不敢更改設  
使改定當此多事之時似難并舉軍籍事本  
曹已承命惟在卿施設之如何耳省州縣事  
果出於寡昧輕淺之意而恐貽他弊不敢自  
是變更卿勸請不已當試之久任監司難於  
創設遲疑到今此亦當從卿策先以兩南試  
之庶賤許通事事變之初因卿獻策即命施  
行而言者論之當更問于備邊司商議舉行  
俗謂非文武入仕者為南行李珥等請以未  
出身人為臺諫韓修柳夢鶴等是也若成渾  
等以逸民被徵者又不在其限  
○夏四月復命許庶賤許通

許良自備裝戍邊滿三年者許通許良又庶孽納米于邊亦得許通良妾子賤妾子所納有差等耳又以兵曹軍士闕番贖布積置樓庫官真視為私藏用之如泥土而司贍寺所儲布輸邊為裝者將盡請盡用其贖布助輸又請以軍資監所儲布充戰士衣減百官祿以給戍兵妻子之糧○以成渾為兵曹叅知渾三上疏辭職上荅曰觀爾上疏有病不即上來即今日氣和暖爾可調理上來卧而獻謨亦何所妨予之待爾正如飢渴長往不

返豈爾所願況今兵判乃爾之故人也今擢  
爾為叅知豈無其意同心同德正在今日爾  
何不幡然上來以副予側席之望也○五月  
賊胡栗甫里領數萬騎圍潼關鎮僉使鄭鯤  
助戰將朴宣等力戰却之○賊胡栗甫里尼  
湯介以萬餘騎分路入鍾城塞虞候張義賢  
判官元喜軍官權德禮等以騎步兵百餘人  
守江灘拒戰良久衆寡不敵德禮見殺餘皆  
還走入城圍城數重萬戶崔浩等與助戰將  
李薦李永琛等以強弩射之賊挫銳而退其

後栗甫里尼湯介率衆再圍防垣堡崔浩與  
助防將李璣等登城力戰虞候張義賢判官  
尹諶等自鍾城府來援中外合勢開門大擊  
賊遂敗退賊胡叛亂半年屢入見挫實無所  
得藩種頗自悔還集納款惟栗甫里尼湯介  
遁入深處亦復寇邊○兵曹叅知成渾詣闕  
上疏辭職特旨除吏曹叅議且賜銀帶渾皆  
上疏辭荅曰觀此上疏予甚缺然爾何無意  
於世且並辭所賜之帶耶禮長者賜少者賤  
者不敢辭况人君所賜之物何可辭也爾當

朕而拜賜於禮為得不可辭也○時抄發射手赴北李珥議于同僚曰自前以戍兵無馬徒行則有掠行人馬載衣裝之弊今此抄兵有三等一等則精壯已足備邊二三等則募令納馬免行則公私兩便也議者皆是之時發軍日迫一邊啓請蒙允一邊下令募納事機無滯矣○六月兩司請罷兵曹判書李珥不從一日上因邊事召兵曹判書珥即詣闕適眩疾猝發扶入內曹直舍直舍在政院門外承旨以承命入來適有疾聞上即遣

內醫看病使退去調理於是兩司交章劾之  
曰軍政重事先行後聞專也承召入闕在內  
曹咫尺之地終不詣政院專輒慢君之罪大  
矣請罷職 上不允○兩司連啓李珥罷職  
事 上終不允乃止珥辭疾不出 上特命  
召就職珥乃詣闕上疏引罪力辭答曰言官  
一時之論何足數也宜勿顧人言更加盡心  
國事而已再疏答曰卿才高識敏忠誠體國  
今疆場多事方藉卿謀猷撫定北方安輯民  
兵用紓予憂須勿疑阻推托以副予望三疏

答曰卿勿以近日事介意速出供職若因一時過中之論輒自沮喪退縮則自古無賢士建功業之時矣卿其勿辭四疏答曰予意已諭近因卿不治事機務墮廢宜遵前旨速出供職毋堅辭退之志用副委任之意五疏答曰卿之心事予已知之衆口之咻不足與較但當不顧其他與予為國而已宜勿固辭至此兵務曠廢一日為急卿不可不念六疏答曰自古賢臣之欲行其志也其有人言之謗毀固是常態本不足恠所以寥寥千載君臣

相遇得做功業者絕無而僅有之卿亦親聞  
嚮者之教乎予命之退然後可退丁寧一言  
鬼神亦知之卿何忍今日欲辭去也宜勿更  
辭抑予所悶者近因卿不出仕非但兵務墮  
廢國事日非去春北方將士之功至今未頒  
殊失賞不留時之義誠恐將士之心由是而  
懈弛也卿其速體予意勉強就職且予欲見  
卿而議事者久矣况日日來詣闕下非不欲  
引對親諭之而非但近日予氣不快輕浮之  
輩必將曰不接大臣惟兵判是見也云故未

果焉卿並知悉○三公詣闕啓曰方今多事之時李珣被論辭避不出請敦諭出仕從之珣又呈病不出上不許始出謝仍啓略曰臺諫既以專擅權柄驕蹇慢上為臣罪目則是極罪也臣乃恬然不動念晏然出仕則實非人臣之義也臣罪虛實豈合置而不問使以負罪之身覲面於清朝乎伏望聖明舉臣之罪咨詢左右爰及諸大夫使之稱量輕重以為可賞則臣雖未安敢不黽勉隨行乎如以為實犯則雖加流放寬強臣實甘心今

茲仰控之辭固知非臣之所敢言然臣無仍  
冒之義而 上教之丁寧可感神祇臣雖終  
日涕泣終夜遶壁而不知所以處身之地敢  
此冒達伏地待罪答曰在卿自處之道雖當  
如是然予詢于左右則是未免一毫疑卿也  
予豈敢為此乎頃日臺諫之言本不近似不  
足為辨卿其安心察職勿復介意 上下教  
三公曰李珣卿等雖請留用而珣萬無出仕  
之理兵務甚急姑遶其職以安其心何如當  
此北方邊報方急國家將亡之時朝廷淆亂

賢邪不辨何以為國乎予不勝痛心此則予當隨後處之令本府議啓兩司即以傳教之意引嫌辭職退待領議政朴淳議李珥豈終不出仕乎然姑遶為當金貴榮議兵務方急珥若難於進退則遶之為便鄭芝衍議珥終不仕則當此多事之時不得不遶然此後事自 上平心處之則朝廷幸甚臣之所憂非但為朝廷欲為珥保全令名耳答曰兵判可速遶李珥已陷於誤國小人豈有令名哉右相之議何其迂也其心不在予殊不測予雖

暗君不屑與小人同事嗟呼李珥其好歸鄉  
閭高卧白雲誰得羈縻哉珥得此教即退歸  
坡州 上下教曰近因兵曹判書李珥言語  
間事臺論相激反覆纏繞至於玉堂上劉比  
珥於誤國小人此非發於偶然言語間事也  
盖珥自前裁抑新進之士惡其趨時附黨累  
為陳論由是見忤於時論者久矣遂因所失  
乘時俟隙必欲劾去後已凡公卿大夫承旨  
不來者多未聞有以慢君論者是何臺諫之  
言獨能直截於珥也其納馬不稟亦不過許

多事務間趁未取稟耳夫擅權慢上入臣極  
罪名之不可不明人君之於小民尚且不可  
以情外罪名輕加於其身况宰相耶既曰擅  
權慢上則何不明正其罪請令有司照以王  
法以戒萬世為人臣者而乃敢請以罷職有  
如乙巳姦臣輩目之以叛逆而罪之以適職  
者之為耶此所以珥不心服抱羞蹢躅累辭  
不已而措辭之際果涉於自辨亦豈有忌克  
忿心於言官哉所貴臺諫者身任公論爾若  
陰濟已私以為排擯傾陷之計則烏在其為

臺諫之道也卿等如以珥為誤國小人則當  
明辨斥退不然攻之者乃小人也安有人君  
用小人而可以為國之理乎分別淑慝其不  
在今日乎卿等不宜含糊不辨也大抵朝廷  
朋比分黨國事日非而大臣不能分辨則將  
置國事於何地耶

上以三公不別白  
是非弄下此教

○秋七

月護軍成渾上疏曰臣盜名罔上坐受高爵  
既違素心內切惶懼方將歸死丘壑不敢久  
留都下而頃者伏遇三司舉劾前判書臣李  
珥加以無君誤國之罪使珥無所容而去政

刑之失無大於此臣受聖明罔極之恩目見時事之非而不言則是臣知朝廷過舉而畏禍不言以負殿下也臣請昧死而言之臣竊觀珥之為人疏通明敏天分甚高少有求道之志慨然以學自勵於衆理雖不能周通而義理大原不可謂無見非如拘儒曲士坐守章句之徒也其愛君憂國出於至誠唯知有國而不知有其身急於濟時不以溫飽為念者乃其平生素所存也雖然氣質如此故其病痛亦有之惟其疏通故有率爾之病

而少沈潜縝密之氣其性白直迂愿故絕無  
修飾外貌調適人情之態志大而濶略於細  
微自信而不循乎時俗是以愛之者絕鮮而  
笑之者多憂之者固少而嫉之者衆矣且與  
時論不合屢陳疏章深論時弊以其觸實故  
益為時人所忌且論薦鄭澈以為可用以是  
尤不合於衆情珥知不可久在朝廷而彼  
殿下不世之遇思欲鞠躬盡瘁以報萬一  
以遲回數歲而不能去也至於論劾中納馬  
免防一事則珥嘗見乙卯倭變時赴戰軍士

掠馬於都中深以階亂為憂初欲啓請而又  
不料納馬者之有無不敢請焉及其馬既集  
而軍士臨行旋給旋啓在急遽之時因率爾  
之失而有此罪也不請命而先下令此固珥  
之罪也然謂之專擅國柄則非其罪也不進  
政院乃眩暈重發之故耳謂之驕蹇慢上則  
非其情也此言發於一臺諫而諸臺諫隨而  
和之大臣為珥請出而不敢以臺諫之言為  
過中噫臺諫過激之言其失小李珥無君之  
罪其惡大欲護至小之失而不雪至大之罪

強令出仕則是欲其入而閉之門也祗緣  
聖教至誠委曲諭珥供職珥於是時不勝悶  
迫以請稱量其罪之輕重者其意豈在於與  
臺諫爭勝負乎只欲開出仕之路以承上  
命耳若彼論而得去無出仕一節則珥豈敢  
為啓辭乎珥之不敢易出乃所以畏公論重  
臺諫而反以為輕臺諫蔑公論不亦異乎宋  
之歐陽脩劉摯皆上章自明未必為小人况  
珥之言在於出仕而不在於自辨者乎而三  
司之論大作又加以誤國小人恣肆無忌憚

之罪初因微罪而加以無君誤國之名又因  
此名而將欲據法請罪是必欲置之死地而  
後已也嗚呼今之言者自以為公論而其言  
之不公不平如此將何以服人心乎若使珥  
為真小人自當直攻其心術如呂誨之於王  
安石可也安有因一過失輒持之以深文陷  
之以峻法者乎此其腹心意態披露於外不  
復以人人覷破為憂不亦可羞之甚者乎士  
大夫當以公平正大為心克去己私為務雖  
攻擊小人勢將不勝而去惟當不失其正無

愧於方寸可矣今乃攻一迂濶之李珣而乃  
設機關不復顧惜士大夫名節今使當事者  
自顧其中果能無愧於心乎雖然今日臺論  
豈皆作意罪珣至於此我不過附會乘時嫉  
妬故務欲去珣而挾宿怨者持其機以至於  
此耳 殿下詢于大臣以國家將亡賢邪無  
辨為教大臣畏其氣焰莫肯出一言以辨之  
聖心鬱鬱無所底向臣聞之以為至痛君臣  
之義寧可止此而已乎天下之忠臣義士聞  
之當有投袂而起者况臣被徵而至猶在可

言之地者乎臣故不以含嘿為哲而以進言  
為義伏願 殿下下臣此章于公卿必令辨  
別其忠邪商議其得失使朋讒竒中之禍不  
作於今日則宗社之福也且臺諫以言為責  
公論之所寄也然隨其人之邪正而言有得  
失之異焉今謂臺諫不可以指議言者不可  
以非間則彼張商英之攻司馬光尹穡之攻  
張浚其將慮言路之杜塞而不可謂之非耶  
今謂玉堂然後可以議臺諫之失而他人之  
議臺諫則輒欲加以凶邪之罪夫安有是理

哉亦在乎其言之邪正而已昔漢公乘興言  
御史飾文深詆以愬無辜之罪宋仁宗謂御  
史以黯黹之言中傷大臣此風不可長也今  
日之事何以異此而一唱攻珥舉朝靡然無  
敢持平於其間則又非漢宋之所有也當今  
外警內憂天災時變一時並作國勢岌岌有  
危亡之象而為臣子者不此之憂乃相與媒  
孽排擯使竭忠徇國之臣無所容而去非惟  
不容又將文致其罪置諸無君誤國之科曾  
謂聖明之世有此事哉殿下不以究是

非辨忠邪為意而以含容兩可為務則臣恐  
善善而無所勸惡惡而無所懼將使懷姦之  
徒有以窺聖意之所在而無所忌憚植黨  
專權常以多寡之勢攻擊忠賢而去之則忠  
賢之禍方橫挐一世而不可救矣伏願 殿  
下勿自菲薄撓攬權綱有以先正是非之理  
辨別忠邪之趨深燭幾微杜塞其源而使  
殿下善善惡惡之心沛然若決江河則國家  
幸甚且臣之所憂豈在於一人之進退哉善  
善而不能用惡惡而不能去此固齊桓公懲

創於郭亡也。殿下既知珥之無他，又知言者讒嫉而兩無所問，則將何以解中外之惑耶？今舉朝無一人言者，而臣以一箇孤賤出而言之，欲以隻手障其橫流，亦可謂愚妄矣。然使臣言得行，而時論由是而平，士林由是而和，國家由是而濟，則臣雖得罪萬萬，無恨。不然，相激相勝，惟欲盡我氣勢之所極而已。則臣之一身固不足惜，而不知國事稅駕之所也。人臣為國當事，歛怨於身，禍必立。至此浮沈取容之士，所以持祿於世也。今珥忘身

任怨竭股肱之力而一朝受此中傷將不能  
保全餘生則異日緩急孰肯為 殿下任事  
哉從今具臣保位大小相徇無敢少拂其意  
而悠悠玩愒以取日閑而已則 殿下勵精  
之志亦無所施而懈怠意生矣豈非可虞之大  
者乎臣竊見今日之事可言者多矣然朝廷  
者四方之本也本之不治臣何暇及他說哉  
且歐陽脩論韓琦富弼之非罪公論所重不  
避相友之嫌臣珥之友也臣雖不及古人亦  
不敢附下罔上以負 殿下也且念臣疾病

已深若在京而死則旅櫬難歸伏望放臣歸  
田使之西出國門而死則臣之大願答曰觀  
爾上疏忠奮激烈如使奸邪聞之足破其膽  
信乎君子一言為國重輕也且既來在于京  
可調病出入經筵以啓沃寡昧未可為辭退  
之計也○傳教領相左相曰以予寡昧無識  
庸暗不敏不知忠邪莫曉是非而卿等乃敢  
為含糊之說予固已洞知卿等之心矣今觀  
成渾上疏大臣事君之道固如是乎當初李  
珣之排擯誰所為耶其朋奸之類又誰耶其

辨別以啓毋更含糊以貽國家之羞於是大臣朴淳金貴榮請面對上即引見歷問今之三司論李珥如此珥果何如人孰為是耶領議政朴淳對曰珥憂國忘身赤心靡他近與同事備局益見其才大矣又言宋應旣許筭皆與珥有嫌顯然修隙其為此論不可不察金貴榮對曰臣不知珥為何如人上強問之對曰知人帝堯所難臣愚昧何以知人○傳教曰人君之所與為國者大臣也故曰安危在大臣國亂思良相昨日子以不知忠

邪莫曉是非問諸大臣而左相金貴榮憚甲  
非乙是乃敢為依阿苟容之態曾見自古大  
臣有如此者乎其身既在大臣之位凡辨別  
賢邪進退人物乃其任也若不知賢邪則是  
不智也知而不以直啓則是不忠也其何以  
居具瞻之地乎此意政院知悉貴榮因是辭  
遶○都承旨朴謹元等啓辭略曰左議政金  
貴榮心知士林無他不可加之以罪故力為  
救解以冀 聖明之一悟其為辭雖不明快  
而主意則可見祗以 聖意之所存異於是

故其為言反為逆耳之歸而視之為依阿苟  
容也自 上少霽威怒平心省察則其庶幾  
釋然矣答曰觀此啓辭可謂指東而答西也  
昨日予問李珣之賢邪左相乃曰臣不知云  
云終乃引知人則哲之語以文之此其心路  
人所知其謂予不知耶夫是非之心人皆有  
之根於天性自有所不容已者人主問之身  
為大臣乃以不知對嗟乎人主之置相豈但  
以不知二字使為其平生相業而止哉而其  
可以不知數語自足以為高風勁節也耶不

知之說其何以服天下之人心自古未聞人  
主問其臣之賢邪於大臣而大臣乃以不知  
對之者苟如此人主自任聰明足矣將焉用  
彼相哉夫倚重大臣固人主之本心而其所  
以倚重者以其辨朝廷之賢邪也以其決國  
家之是非也今乃入對君前一則曰不知二  
則曰不知噫以暗主而遇不知之相是猶以  
瞽而借盲之視欲正天下之危將見相率而  
顛隤莫之救以死也夫以寡昧之資叨守丕  
丕之基心知相臣之非國事之去而區區於

舍容之小慈而不能一為戮言以警後世之  
為人臣者則是為一大臣而忘 祖宗之宗  
社也不幾於失輕重之權者耶誠不忍不言  
而負 祖宗也予之此言豈予之所願不得  
已也○王子師傳河洛上疏曰竊聞三司同  
辭駁擊前兵曹判書李珣不遺餘力珣乃引  
身而退浩然而歸此乃珣之幸而實朝廷之  
大不幸也夫珣之為人臣固不知其為何如  
也然嘗聞之朋友相傳之語其為人也好讀  
聖賢之書篤志力行持身檢心勤慕古人而

及其見用於時也 聖上傾心小民加手渠  
乃匪躬殉國盡其心而竭其力思有以上裨  
衮職而下濟蒼生凡百施設惟務祛弊而不  
顧忤俗汙康民勞而不循舊習適當北鄙之  
急身為兵官之長調發軍馬轉運糧餉不得  
不并舉於一時要以固邊圉而制狄兵者是  
珥之所以欲行其所學而報知己於 聖明  
者也其間雖或未免有踈漏過誤之舉而原  
其本心則豈故為顛倒變亂以之誤國而病  
民也哉乃者言官交章論劾始以微舉其失

終乃漸加其辭日以益重至於玉堂之劄諫  
院之辭極其奸兇之狀盡其詭譎之態千言  
萬語橫說豎說蓋莫非憤疾之辭嗚呼三司  
者人君之耳目公論之所在也以三司而為  
君之耳目公論其為任顧不大哉而乃敢探  
撫捏合欲加大惡於人其所見不亦誤乎其  
中爭訟殺人百石受賂等事所關至重尤不  
可以容貸耳果有之則當明正其罪以示王  
法不可視為尋常而不問也今夫閭巷之人  
言於長老必當平心正色不欺不誑告之以

實使之曉然知是非之所在況於君臣父子  
之間安得以無實不根之浮辭務為熒惑其  
視聽哉人心拂鬱巷議橫馳父兄之畏時論  
者間或戒其子弟而同然之心不能自己發  
而不自禁者比比有之至於軍人武夫亦欲  
叫號九天而訴其情嗚呼所謂三司公論之  
下難保其必無別生一公論也噫珥之於時  
也獨立寡助欲以成內修外攘之功其志則  
忠矣而其計則踈矣且成渾以山林隱逸高  
蹈遠引懷道自樂無一毫榮慕外物之念有

百年專靜自守之心實德內積名聲外聞終  
渙九重之綸不免三聘之起蓋卜其出處而  
為世污隆者也早與珥為道義之交天人之  
學義利之辨相與講磨切磋極其趣而會其  
要雖謂之同心同德可也頃年渾之在城三  
司論珥彈文在袖日漸加重渾之心若以珥  
為非則雖有相厚之私情而豈敢誣飾辭疏  
跛曳闕庭以陰覆其罪惡而欺罔 殿下之  
聰明哉山人之用心果如是乎雖三尺童子  
決知其無是理也言者怒甲而移乙至謂渾

托身山野而書札絡繹於都下朝廷政令人  
物進退莫不與知而其去就亦不在君父  
而在於所親之折簡然則渾特假借山林欺  
世盜名利功名樹黨援一麓鄙無狀之人也  
其前後辭職恬退自樂於畎畝者只是做得  
一箇干進之捷徑爾夫謂渾之賢而有是事  
哉至此而人心愈不勝其憤鬱離心解體皆  
欲蹈東海之濱也且領相朴淳之為人臣尤  
不敢知也第聞其清慎雅潔愛人下士果能  
保此八字則雖謂之賢相可也頃者榻前之

辭豈無所見而曷嘗有構誣陷害之心乎今  
乃歷數十罪極口詆排無異元衡李邕之奸  
嗚呼在聖明之世尚忍言哉至於以淳珥  
渾三人相為表裏植黨固勢則尤非所以厭  
服人心者也彈章之下彼豈敢苟容哉今日  
珥去明日淳去又明日渾去二三日之間家  
髦遜荒山人去國相繼而逝惠好同車氣象  
愁慘觸物生悲聖上孤立無敢言者前日  
言官之辭曰網打空人之國者無乃是耶大  
抵言官之職以言為責常欲堯舜其君故不

待有過而糾之又欲稷契其臣故不俟致失而責之是故上無過舉下有實效乃能共躋治平之域此乃公心直道殉國忘家斷斷不二者之所為也今之言官皆有是責皆有是忠夫豈不欲稱其職而使吾君為堯舜使吾相為稷契哉然而其間不無一二果敢之人其言辭舉動或不免顛倒失中而已今乃洗垢覓瘢求過於無過嗚呼言出而人信服之者恐不如此也臣以愚昧無狀久叨匪據之地目擊時危忠膽自大口欲緘而不得緘舌

欲囚而不得囚自不知言出而禍隨為之收  
淚而跪陳其愚衷焉荅曰今觀疏辭具悉爾  
意○八月都承旨朴謹元等啓辭略曰臣等  
伏觀河洛之疏不勝驚愕之至近日三司爭  
論皆公共而洛阿其所好反以熒惑欺誑斥  
之至於獎許淳珥及渾巧中 上旨而不料  
人之視已如見其肺肝矣自 上若以匹夫  
之言而謂不足與較其於奸狀曲折或未能  
洞燭明辨之是非何時而可定乎私相指喚  
繼此而起者將不勝其紛紛矣臣等職忝近

密目見喪邦之禍迫在朝夕故不敢不達傳  
曰今觀啓辭爾等欲杜塞人言掩蔽予聰明  
耶如是而終欲為何事耶予雖昏庸豈爾等  
所指教者耶其謂予不能治爾輩耶大抵公  
論之在人間如水之在地中不必以臺諫而  
是不必以芻蕘而非惟其人公則其言公自  
古以來臺諫侍從之名何代無之而公論在  
朝廷者鮮矣夫公論在於朝廷則治不在於  
朝廷則亂此所以百世無善治者也今茲臺  
諫之言人心不服義士奮袂將四面而起爾

等雖竭力彌縫不可得矣○成均生貢柳拱辰等四百六十二人上疏伸辨成渾李珥等被誣荅曰予以寡昧叨守鴻臚知不足以辨賢邪才不足以治國家使朝廷不靖是非混淆責在於予夫復何言今觀疏辭忠讜激勵爾等義氣如此予何憂國事政院以傳教未安待罪傳曰邊塵屢驚國家多事政院在樞要之地機務多不致察雖由人才之短長夙夜匪懈恐不如是其勿陳雜言姑勤職事○兩司啓曰臣等將一國公共之議冒萬死叫

閣廷爭今已半月萬口一辭皆以為不易之  
讜論而臣等誠微迄未回天悶迫之際今有  
公論不在朝廷臺諫之言人心不服之教此  
實臣等奉職無狀不能取實於聖明之致  
請命適差答曰自爾兩司論啓之後予不下  
一言予非口吃者豈無一言之可發一威之  
可施者乎以君臣之間所傷者多也當此國  
家艱虞生民塗炭之時爾兩司孰非李氏之  
臣而惟茲大臣公卿皆比肩一時如兄如弟  
者何不先公後私痛去己意渙然冰釋協和

一心戮力王室耶爾等兩司莫如即日停論  
將一場紛拏付之一笑而更勿思之此非予  
韋實兩司之利也君臣之間情如父子故予  
今言之若執迷不悟論之不已則予豈但默  
默而已乎將有不得已之舉他固莫恤也到  
此時也其無悔乎予言不再勿辯○都承旨  
朴謹元右承旨金悌甲右副承旨李元翼同  
副承旨成洛等啓曰昨日儒生章疏之說臣  
等固不足深辨但自前館學陳疏例必從容  
會議商確可否然後為之今此舉措則不然

私自指囑鼓動謬議或教誘或劫制而不來者甚多來而不從者亦多皆是有識之人也如此之狀自上何從以知之乎下荅之辭反加褒獎至以忠讜義氣許之臣等竊恐士風益壞恣情妄行終無以為國也伏願殿下留心省察焉上問何承旨草此啓耶李元翼對曰執筆者非必已意獨然竊想下問之意在於欲罪其人臣等安敢歸罪暫時執筆者乎非惟臣等不敢對自上亦不可使之強對也上乃止不問傳曰仕進承旨並

出送入直衛將鄭復始權擘命招假承旨察  
任傳曰都承旨朴謹元右承旨金悌甲右副  
承旨李元翼同副承旨成洛適差即日為政  
出代○大司憲李陞執義洪汝諄掌令尹承  
吉李徵持平李景燠許鑑等上劄曰國是靡  
定公論日激三司交章伏閭已久天聽遲  
疑讒賊日至殿下未能洞燭其情狀反為  
嘉獎此固國人之所共悶鬱也政院昵侍咫尺  
不忍嘿嘿歷陳無隱而殿下非徒不為採  
納遽加嚴威而斥逐之國家以出納惟允

之任付之喉舌之臣敷奏覆逆獻可替否乃  
其職也朴謹元等目覩讒口交亂士習壞毀  
憂時獻忠盡言不諱區區之誠只欲不負  
聖明委寄之意耳豈有他哉一忤聖旨輒  
施雷霆之威使無所容其身此豈臣等平日  
所望於殿下者哉伏願聖明克去偏係  
之私恢弘虛受之量勿以順旨為是勿以逆  
耳為罪以公好惡不勝幸甚大司諫朴承任  
司諫李希得獻納權浹正言沈岱李澍俱上  
劄與府劄同答兩司曰在昔宋時六賊當朝

李綱去國太學生陳東等上疏而極論之千載之下聞其風節尚不覺投袂而興起今茲館學儒生目見朝論之乖宜國事之日非倡義相率叩闕抗章讀其疏其忠肝義膽凜凜有不可犯者誠可謂不負所學而橫流之砥柱也夫太學首善之地公論所在朝廷是非可亂於一時而太學之公論焉得以廢也自予即位以來諸生上疏非一而其間豈無訐直逆耳者而予未嘗一示不悅之色必以溫言巽辭慰諭而遣之誠以國家元氣在此朝

臣可罪而諸生之氣不可折也設使狂生所  
為或有過重猶不可待之如此況其正直之  
氣邁青松而挺孤節者哉予以千乘之尊尚  
且屈已下之彼么麼數臣昵伏近密恣為朋  
比杜絕人言掩蔽聰明乃敢目諸生以悖亂  
是欲踵黃潛善之所為真小人而無忌憚者  
也予不即舉流放竄殛之典將使魍魎之類  
騁驚於昏夜已為失刑之甚而終未免為漢  
元所歸爾兩司反為伸救耶劄辭當留意焉  
○全羅道儒生徐台壽等上疏伸辨李珥成

渾等被誣答曰觀此上疏爾等儒生之言愈  
出愈竒深用嘉歎予雖暗懦豈畏此邪臣數  
輩而不為之罪哉顧以人君御衆之道自與  
匹夫之悻悻者不侔苟能取快於一時終必  
貽患於後日為國之道在於從容不動而處  
之況智者作事愚者效焉賢者立法不肖者  
則焉予念慮多矣爾等義氣奮發竭忠極言  
至斥以不武至比於郭公理宗予誠受而不  
辭也予身尚且斥譏之況臣僚耶當今士子  
風節遠邁漢宋矣上命招二品以上引見

于宣政殿下教以近日朝廷不靖專由於沈  
義謙金孝元兩人之致欲遠竄何如左右皆  
以為當初分黨雖由於此兩人今皆補外不  
干與於朝政不必罪之上又教以朴謹元  
宋應旣許筭三人予知其奸遠竄何如左右  
以如此之人雖有過越之言聖明之下不  
可以言獲罪力為伸救鄭澈進啓此人等不  
可不明示其罪以定是非上以親札下教  
于禁府曰長興府使宋應旣昌原府使許筭  
前都承旨朴謹元等以邪險之性挾斗鬬之

才締結浮薄之徒作為朋私之黨互相汲引  
盤據要津或塵喉舌之司或冒臺侍之官張  
皇聲勢簧鼓邪說擅弄權衡賈制朝廷傾陷  
大臣排擯忠賢朋比之跡已彰尚稱公論挾  
憾之蹤盡露自謂貞方事皆罔蔽言盡誕誣  
忠良屈抑惡已極於濁亂羣小得志罪難逭  
於誤國遠近咸知朝野共憤尚寬肆市之誅  
薄示惟輕之典於戲錯枉舉直為政之要懲  
惡勸善制治之道可怒在彼予豈得已並削  
奪官爵竄黜遠方應泐竄會寧謹元竄江界

筭竄鍾城

上以鍾城方被兵命移配甲山

初應旣為大司諫  
為典翰持命補外

○大司諫金宇顥司諫

黃暹獻納洪仁恕正言朴弘老啓曰新授濟  
州牧使金應南久侍經幄君臣之契不淺罪  
名不章投畀魑魅之鄉豈料聖明之世讒  
間之行至於此極請還收應南出守之命又  
伏觀昨者宋應旣等責辭極重此人等固有  
罪矣若繩之以重律則刑罰不中人心不安  
矣當初李珥當國重任才疎意偏言論處置  
動拂物情應旣等浮躁輕銳徒見珥不是處

彈劾之辭大不着題謹元等識見暗昧又不  
能分析事理開導 聖德而多陳冗雜之言  
以致 聖心之疑此固皆不能無罪也然推  
原本情則只出於上恃 聖明有懷必達不  
自覺其過越何可深罪乎請還收遠竄之命  
答曰爾等其勿營救於彼身無益而反傷矣  
使之見懲可也國可亡這三奸斷不可貸予  
言不再至於金應南之為人雖常侍經幄而  
入侍不多故予實未知其人物及為承旨委  
以兵務予果愛其勤幹慎實信之不疑慶安

面對斥之而亦不疑厥後臨朝偶教曰應南  
能察職事云云則應溉輒即極口贊之到今  
見之應溉乃奸邪之魁而應南為此賊所贊  
其締結朋比灼然甚明而近以慶安之請對  
為李珣所囑云如此不道之言必應南輩忿  
其直斥其名做出邪說誣陷也罪狀已著予  
實痛憤不即並正其罪而乃敢授以濟州於  
國失刑而於其身幸矣應南其往無辭焉若  
能革面圖新則他日未必不親寵也金宇題  
等又啓伸救金應南宋應溉等事曰寧輕三

人之罪以安朝著以全士林未必非社稷之  
長慮也答曰爾等豈以此三人為無罪也只  
緣過慮幸有蔓禍為此不得已煩啓也是豈  
知予心者乎予之言語舉措皆有次序當初  
三司之啓辭也予明知誣陷而未嘗遽示威  
怒猶恐一人之有傷諄諄教誡一則曰渙然  
冰釋二則曰協和勸力又曰否則將有不得  
已之舉矣頻加誨諭而固執迷途或以為危  
言以動之或以為溫言以諭之反以予言為  
侮弄之資其所為說則愈出而愈激不究是

非不自反顧閃弄筆舌力戰取勝可以此服  
國人之心乎噫嘻予意可謂勤且不迫矣今  
日之舉豈予之所願蓋彼自取之也唯三人  
之外更無他慮凡今在位之臣各安其分無  
或少疑但當盡心職事諫院不必更煩使有  
罪者受罪而已至於金應南予實未忘其為  
人今日親見而溫諭之應南當必知予意矣  
姑往不妨大抵予豈偏於所好者哉如領相  
李珣之所失亦須明諭矣○判敦寧府事李  
珣退歸海州上疏自劾 上答曰觀卿上疏

噫天未欲平治我邦耶是何以卿之為人而  
不得於時耶意者天使卿動心忍性增益其  
所不能將任舟楫霖雨之責於後日也天之  
於卿可謂曲成而王汝矣今日之事是乃天  
獨厚於卿者也於卿何損焉夫人言之嘵嘵  
不滿一咍卿何足介懷安可遽出辭職之言  
乎嗟乎世已降矣時已澆矣鄭聲亂雅傾軋  
成性殺人之謗亦及於魯參則其母之不為  
投杼者幸矣卿不可不速來見予兼陳懷抱  
慰安衆情在此一行卿其勿復固辭急速乘

駟上來○特拜成渾為吏曹參議因下教曰  
爾既承召入京一不入對何以不辭於予徑  
自還鄉有若逃遁之為耶良由待爾不誠致  
有人言予過大矣爾勿以雜言介懷斯速上  
來○黃海道儒生等上疏伸辨李珥彼蟻之  
誣上答曰觀爾疏章忠義奮發辭氣凜然  
可謂未死奸臣骨已寒安得若爾輩置之朝  
廷也予深嘉歎宋應旼已從末減薄示譴罰  
爾等宜知之○司諫院啓曰近來朝著不靖  
人心疑懼鎮定之策矣今不圖則同寅之義

終不得致也前日兩司論劾兵官初非有意  
攻擊持平李景燠本以浮妄之人不議同僚  
自以已見添入慢擅等語以啓爭辨之端掌  
令李徵又於避嫌啓辭下語過當此二人生  
事於前而宋應旣許筭等輕躁激發再誤於  
後致有今日之騷擾今應旣等得罪過重人  
情矜愍至於初非有意生事之人亦皆紛紛  
補外物議嗟惜而若景燠等論事乖當以至  
僨事而尚無譴罰物情未便請並罷職以懲  
其失禮曹判書鄭澈本以剛偏忌克之人失

勢之後快快憤憾多有不平之氣交構煽亂  
使士類分裂又乘時傾陷無所忌憚觀其處  
心積慮必欲生禍縉紳以逞私憾情狀呈露  
人人痛憤今 殿下務欲鎮物而此人在朝  
陰行巧計惹起紛紜職為亂階請罷職以正  
其罪答曰無以為也諫院必為人所教唆耳  
予知此論之意耳是不過欲去鄭澈而並及  
一二前臺諫使予見之認以為和平之論而  
不疑之耳如兩李何足道哉不過以無識搖  
尾之人得除言官為邪黨之先鋒耳今此輩

情狀敗露技窮術盡欲歸罪於兩李圖為自脫其謀可哀也已實如啓薛當初只欲駁正其事初非攻擊之意而城上所自以已意添入慢擅等語則其時三司有何所難而不為駁正適差反肆邪說無所不至必欲賊害忠良而後已耶其平日旁伺信然之心蓋未嘗一日忘于懷第未得其隙爾一朝見李珣小失挾彈睥睨之徒崔躍而起自以為時我不可復得於是邪說充塞四面圍合小人之謀可謂巧且險矣而其實誠愚也况其時憲府

啓辯亦有此等之說與景慄別無異同而今  
此啓辯乃曰以已見添入云者是何言耶然  
此人既皆邪黨依啓罷職至於鄭澈之為人  
其心也正其行也方惟其舌也直也故不容  
於時見憎於人耳若其當職盡瘁清忠節義  
草木亦知其名矣真所謂鵷班之一鶚殿上  
之猛虎也頃於引對之日讜言斥邪予固知  
其今日得此謗故即面諭于澈其果然矣若  
罪澈是朱雲可斬也為今之計莫如勿擯鄭  
澈勿舉東西勿言已往則不求鎮定而自當

囿於和平之域不然前車之覆恐移轍於後也○領相朴淳三度呈辭傳曰辭章三上予心瞿然然卿之心事奸臣之誣罔予不必煩諭今若許卿辭退則是欲濟川者自折其楫耳予雖愚暗必不至此卿速出仕撫定衆心○領相朴淳上劄辭職答曰卿清慎雅操愛人下士正色立朝允矣鎮物之喬嶽忠幹許國展也濟川之舟楫方切倚任之志詎容休退之告速出治務毋庸固辭○特旨以李珥為吏曹判書連下旨促召珥累辭不許乃赴

名○吏曹叅議成渾上疏辭職答曰予雖不  
敏何敢強屈爾志責爾職事只欲得聞啓沃  
共濟時艱近日鬼蜮之說何足置齒牙間哉  
以爾道德豈嫌於此乎斯速乘駟上來○行  
吏曹判書李珥自海州還京謝恩後上疏略  
曰臣雖至愚自知甚明臣之冒居重任其不  
可者有四請冒鈇鉞之誅而悉數之伏冀  
睿察焉臣稟氣輕浮學問滅裂方逞意廣識  
淺言濶聽其謀則似忠施諸事則實踈由是  
衆心不服羣誚所萃今日疵臣者豈皆讎怨

亦為時論所非其不可者一也世道已敗人心已壞因循者無責矯革者罹謗今欲束手無為則危亡必至建白改紀則衆怒火烈雖以豪傑之士忠良之輔亦難措手況以空疎駁雜如臣者乃敢踴躍栖栖欲有所為乎其不可者二也臣本愚愿短於審勢累上疏章直觸時忌士心不附孤立無與今日一番騷擾是臣不見信於儕輩所致豈必媒孽搆陷而然也不信乎朋友而能獲乎上者未之前聞今臣強顏秉銓進退人物人誰信服其不

可者三也臣少有疾病到衰尤甚血氣消耗精神減少暫為勞動輒發眩昏今欲竭智殫慮仰補衮職則神思不逮陳力就列以效微勞則筋力不及其不可者四也負此四不可終無進步之地臣以何心濫處百官之長乎即引見慰諭仍教曰予如漢元帝之為君不能斥遠小人國幾亡矣珥對曰朴謹先宋應旣固邪人也許簪則年少輕妄其才華可惜非邪人也此三人得譴太重同罪之人皆不自安須從寬典○吏曹叅議成渾入京不為

肅謝上疏辭職 上引見渾請罷政院蒙准  
疏章入啓之例以防壅蔽之漸命議于大臣  
以為定例

國朝寶鑑卷之二十九

宣祖朝六

**甲申**十七年春正月吏曹判書李珥卒珥自為  
兵判盡瘁成疾至是疾甚上委醫救藥時  
徐益以巡撫御使赴關北上令就問邊事  
子弟以為病方少間不宜勞動請辭接應珥  
曰吾此身只為國耳正復因此加重亦命也  
強起延待口號六條方略以授之書畢而氣  
塞復甦踰日而卒年四十九上驚悼發聲  
哀哭進素膳三日恤典加厚珥字叔獻號栗

谷生而神異廓然有大志聰明夙慧七歲已  
能通經著書至性孝順十二歲父病刺臂出  
血泣禱先祠父病即瘳為學不事雕篆而文  
章夙成名聞四方因喪母悲毀誤染禪學十  
九歲入金剛山從事戒定山中譚言生佛出  
矣既已省悟其非反而專精正學不待師承  
洞見大原剖析精微篤信力行登第之後屢  
辭清顯不欲小用其道退居海州山中講學  
授徒建隱屏精舍祠祀朱子配以靜菴退溪  
以為矜式地其出處辭受一以古人自律少

慕張公藝九世同居常揭圖看玩至是請伯  
嫂奉神主同居大會叔仲子姪與同衣食歲  
時朔望晨朝展告謁拜一遵家禮下逮婢僕  
參謁出入具有禮式別作訓辭諺譯教訓閨  
門如官府會食一堂絃歌遊處皆有禮節立  
朝事上竭忠盡力雖退處田里惓惓不忘  
前後封章面奏切直懇惻其論治體規模高  
遠以挽回三代為期見國勢衰靡灼知亂兆  
常以格君正俗和一朝廷為本領而以更弊  
政救生民增修武備為急務反覆論列終始

一意雖被小人俗流排沮而不少恤上始  
加裁抑晚復契合寵任方隆而遽卒矣○二  
月吏曹參判成渾始拜命仍辭職上答曰  
頃喪賢宰寢不安席方今共國事者非卿而  
誰勿遽為退去之計渾再辭不從渾乃一參  
政而遼仍乞還山上勉留之○前兵使李  
濟臣歿于謫所經筵官李友直啓請還給職  
牒上問于大臣皆曰濟臣持身有清操死  
後家無甌石之儲且變起倉卒乃能率殘兵  
焚蕩賊巢軍律嚴明士卒用命雖有差誤之

罪合蒙寬宥也 上曰濟臣清操出常云極  
為可嘉人臣有清節雖大罪猶當曲赦況其  
身已死者乎可還職牒是冬又下教曰李濟  
臣之貶非坐軍機只留標信三日耳當慶源  
之變能驅策諸將藩胡部落幾行誅滅藩胡  
至今殘破奄奄國威少伸當此廷臣欲效和  
議之日尤有以起予之思也況濟臣清節可  
尚予欲追贈兵曹判書遣官致祭官其子一  
人其令大臣議之大臣議皆如教而獨盧守  
慎以為贈職太過 上又教曰北變之作如

癰疽積年內畜一夕潰決大命隨之莫非奸臣弄權培克之致而朝廷置邊事於度外此變之作晚矣濟臣如匡勸者其能策羸卒數百盡誅胡落耶指濟臣退縮云者欲使為元績耶今乃曰無前之變作於其身不亦冤乎予謂朝廷失慶源濟臣復之此人討叛滅賊不世之勲也濟臣若在必能使君父紓憂此予中夜以起撫髀歎息欲加褒贈者也其令二品以上覆議宰臣多以為不可上猶遣禮官祭其墓○三月領相朴淳八侍經筵啓

曰李珣誠心國事盡瘁為期不意身死使愛  
君憂時之志不得展布施設似當有追褒之  
典上命議于他大臣皆以為依朴淳啓辟  
施行為當答曰李珣之為人予洞知之自下  
更無所達之事官至贊成其品已極追贈何  
關但其妻子向坡州又向海州令本道一路  
護送葬時諸事亦令顧護○夏五月大司憲  
鄭澈應求言旨上劄陳戒闕失其末曰許筠  
宋應旼朴謹元等定罪斷自宸衷是非已  
定今不可輕議然投之絕塞必死之地人情

不安若稍輕之量移中道則恐是盛朝仁典  
其時承旨亦已久廢不用以不能立異之故  
並棄如主張者然則失中伏願 聖明少垂  
察焉傳于政院曰都憲獻說極為駭愕但此  
人素以剛直忠盡為名姑優容不責知悉大  
司憲鄭澈避嫌啓曰伏覩下政院之辭惶恐  
踉蹌無地自容朝家已定之罪人大臣所不  
敢言而臣乃越分犯威偃然為請上以動  
聖心之疑下以起羣聽之駭臣實萬死難贖  
伏願 聖慈亟正臣罪答曰此輩壞亂朝廷

之罪在法固赦而予不即舉兩觀之誅投竄  
于外使之安卧偃息又不治其黨與志欲囿  
於度內期使革面其暗懦不斷宜召天譴卿  
反以是為言使奸邪生意無以為國此予所  
以不得不錯愕者也此言幸而出於卿之口  
予姑優容不韋而出於他人則予必有處之  
之道矣且既已召問使之無隱而若譴罰隨  
之則人將曰求言而反罪卿其勿辭安心供  
職○秋八月黃廷彧奉 皇勅回自京師廷  
彧至京呈奏文例下該部廷彧別具呈文于

禮部頓首固請禮部尚書見其文辭感歎稱  
善遂覆題請先謄書秘典所載寫勅付還  
帝從之勅書略曰先該爾以乃祖諱又蒙不  
遑累請昭雪已許新修會典內詳載而纂輯  
有緒尚未告成茲爾復申前請特命史官錄  
示今據新修會典稿內載稱云云前項事由  
與爾原奏相合俟書完進覽頒行之日差官  
齎送爾國先諭爾知之 上大悅告廟頒赦  
解御錦裘賜廷或進階嘉善賜奴婢土田書  
狀官以下賞賜有差○上下書于京畿監司

曰成渾安貧守道隱居求志因子屢召情然  
而來惜其多病暫許歸山今者歲聿云暮宜  
使長吏存問量賜食物


**乙酉**十八年春正月設校正廳校正經書訓解  
選諸儒為官僚○二月御書存心養性四字  
下弘文館令製詞以進○夏六月領議政盧  
守慎請疏放宋應溉等上允之傳教守慎  
曰惟茲宋應溉許筠兩個奸人挾其宿憾奮  
其詐謀黨比先倡誣斥賢士躁妄之徒從而  
和之遂致朝野大亂邦國抗捏按以九刑必

在罔赦故已將兩人加以流放之罪使後日  
之為人臣而懷私病國者知有所戒孽由自  
作罪不可逭第卿言之故予茲屈意從之命  
放釋歸鄉任便居住○秋七月命刊布文天  
祥方孝孺鄭夢周文集 上欲崇表節義以  
勵風俗故有是命命盧守慎作序文又刊行  
岳王精忠錄柳成龍作序文

**丙戌**

十九年夏五月前領議政朴淳久在江村

托浴椒泉往永平縣 上遣中使宣醞于門  
外淳即席賦詩一絕云答恩無路寸心違

拾殘骸返野靡一點終南看更遠西風吹淚  
薜蘿衣上見其詩知已決歸乃下旨累召  
皆辭上下諭曰見卿薜䟽知卿歛迹不歸  
其於自處得矣一時風氣之象不好前所以  
催卿上洛不使顛倒于草莽之間者非為卿  
也有旨到日即上道來居于京渾又薜不至  
三十年日本國使橘康廣來聘日本有天  
皇僭號紀元而不預國事國事聽於關白關  
白稱大將軍或稱大君以皇王同稱故關白  
不得稱王源氏為關白二百餘年而平秀吉

代之秀吉者本賤隸人不知自出關白拔之於傭丐為卒伍善戰積功為大將至假關白旌鉞討叛遠道國人怒其僭越反攻關白殺之秀吉回軍戰捷仍大殲源氏自立為關白用兵四克并吞諸島提封六十六州鍊精兵百萬日本之盛古未有也秀吉志滿意得又慮內患遂欲侵犯中國以前世舟犯江浙終不得意欲先據朝鮮從陸進兵以窺遼薊而我國邈然無聞知聞秀吉弑君篡國而亦不詳其故矣秀吉言我使每至朝鮮而朝鮮使

不至是卑我也遂使康廣來求通信書辭甚  
倨有天下歸朕一握之語康廣之還但答其  
書契而稱以水路迷昧不許送使橘倭之來  
也上以日本乃篡弑之國不可接待其來  
使當以大義開諭入送命從二品以上議其  
可否皆以為化外之國不可責以禮義使臣  
之來當依例接待上從之

**二十一年**春正月北兵使李鎰巡到慶興  
遣虞候金遇秋領四百騎乘冰渡江曉襲楸  
島叛胡斬三十三級繼發吉州以北諸鎮兵

二千餘騎會寧府使邊彥琇穩城府使楊大  
柵富寧府使李之詩為將領潛師渡江夜襲  
時錢叛胡焚二百餘家斬三百八十餘級○  
二月謝恩使俞泓還自京師得頒賜會典成  
書并捧勅來宣泓至燕京呈文禮部乞得會  
典成書禮部以未經 睿覽難之泓與一行  
負役詣請懇迫至叩頭出血涕泣固請尚書  
沈鯉為之感動具本題請 天子可之特賜  
本國付卷又降勅宣諭書云陪臣至誠懇請  
茲特徑賜云泓出關時主事馬維銘以詩賀

之上延勅于郊外告廟大赦御殿受賀教  
書曰承 天子寵光永灑污穢之恥與國人  
同慶爰推渙汗之恩萬物咸休一邦再造顧  
惟眇躬叨守丕基痛 先系之受誣何安乎  
衣錦食稻悶逆名之冒偽難改乎孝子慈孫  
惟降勅之屢勤奈成書之未覩予心將疑將  
信望宸極而逡巡 王言如絲如綸帶寶訓  
而流布源流歸正於玉籍忠憤荷褒於金章  
自 列聖二百年籲呼之疏奏幾切環東土  
數千里數絕之倫紀始明念茲同歡亨泰之

辰必有非常曠蕩之典昭告既遍於廟社惠  
澤宜霈於臣民命賞俞泓官階超秩為崇祿  
判府事賜奴婢土田從行子大述並進官

上引見面慰曰卿血誠籲呼竟得完書使三  
韓民物無父而有父無君而有君蕭曹衛霍  
之勲未足為比也○三月羣臣以改宗系  
光前烈請上尊號而不許上見主事馬維

銘詩令館閣諸臣和韻以進上自和一章

宗祊今始正莫謂是予誠列祖功曾積諸

臣惴幾營恩沾同大造歌競及流鶯願守區

區志千秋戴 聖明註云羣臣欲加徽號故  
末句及之以示羣臣且教曰俞泓之是行也  
間關萬里殫盡一心手捧綸音親擎寶典變  
禽獸之域為禮義之邦是吾東方再造箕疇  
復叙之日也可使其詩泯沒於後乎予為是  
懼爰命詞臣各次其韻詞臣反歸功於予失  
其旨也予亦不可無言夫詩以言志不以辭  
害意可也○夏四月時大臣諸宰伏閣請上  
尊號 上不許副提學尹國馨因進講入侍  
啓曰羣臣請上尊號而 殿下固讓不許其

為盛義反有光於受誦 上納之○日本國  
使平義智玄蘇來聘求信使通好義智者日  
本大將平行長女婿也為秀吉腹心對馬州  
太守宗盛長世守焉島服事我國時秀吉去  
宗氏代以義智詐言義智乃島主之子熟諳  
海路欲導信使之行故遣來而實欲探試窺  
覷也僧人玄蘇及平調信從之玄蘇謀士調  
信勇將也以吏曹正郎李德馨為宣慰使儻  
接入京義智年少驚悍他倭畏服俯伏膝行  
不敢仰視久留東平館必邀信使與俱朝議

依違不決先是損竹島之役捕得倭口言我國邊氓沙火同者叛入倭中導倭為寇朝廷憤之至是議者言宜令日本刷還叛民然後議許通信以觀誠否上從之乃使館客諷之義智曰此却不難即遣平調信歸報其國使悉捕朝鮮人之在國中者以來

國朝寶鑑卷之二十九

唐太宗皇帝

國朝寶鑑卷之三十

宣祖朝七

**己丑**二十二年秋七月日本國平秀吉平義智  
玄蘇等刷還本國彼擄人金大璣孔大元等  
一百十六人又縛送叛民沙火同及丁亥賊  
倭緊時要羅三甫羅望古時羅三口曰入寇  
之事非我所知乃貴國叛民沙火同誘五島  
倭搶掠邊堡今故捕致聽貴國處置乃懇我  
使者至其國修好 上御仁政殿大陳兵威  
受其獻詰問沙火同斬於城外頒教中外中

外進賀賞義智等賜內廐馬一匹復御殿引  
倭使賜宴義智等皆上殿進酌而罷時倭使  
留館通信之議未決禮曹判書柳成龍請速  
定議勿致生釁翌日上御朝筵大臣及大  
將邊協皆以為宜遣使報答且詞彼中動靜  
非失計也始許遣使通信義智等還○義智  
等獻孔雀一雙鳥銃數件命放孔雀于南陽  
海島藏鳥銃于軍器寺我國之有鳥銃始此  
○前領議政朴淳率淳自幼以文行著聞

明宗親試賜第屬意甚重在館閣忤權臣意

罷免末年復被擢用劾出兩權臣士論始伸  
朝廷肅清為善類宗主及與盧守慎並相居  
位十四年二人皆重望而人病其無所建明  
然淳自以才短於經濟專務薦賢讓能故力  
薦李珣成渾終始協濟及黨論之分淳以右  
珣渾重彼彈劾目之為奸邪至謂三人貌異  
而心一上曰善類相從何傷於道既退去  
而上猶眷念不衰至是卒○冬十月聖節  
使工曹叅判尹根壽迴自京師帝降勅頒  
賜會典全部初根壽之行無為奏請頒降辦

誣條所載會典全部 帝特命宣示秘史所  
載本國世系正本並頒賜會典全編宣勅于  
皇極門內翰林學士將禮傳命以重其事勅  
書曰朕惟會典一書我祖宗舊章國家成憲  
藏之內府副在有司其在外藩未嘗輕示以  
爾世守職貢夙秉忠誠備屏翰于東韓襲威  
儀于上國雪累世不明之系既遂懇祈慕昭  
代不刊之書仍思快覩朕視猶內服嘉與同  
文勅賜全編俾傳永久茲付陪臣齎回本國  
以慰爾惓惓陳請至意爾奉茲圖籍式是章

程既全被于光榮宜尊藏于秘密尚念綏懷  
之寵彌堅翎戴之忱 宗系辨誣事經累朝  
祈請今始准改得正降示秘史會典歷代待  
東藩所未有之寵章也 上以頒會典全書  
告宗廟頒教命尹根壽進階資憲拜刑曹判  
書賜田宅臧獲○黃海道觀察使韓準載寧  
郡守朴忠侃安岳郡守李軸信川郡守韓應  
寅等上變書言前修撰鄭汝立謀叛汝立亡  
命初汝立數被譴旨遁歸湖南朝廷每擬清  
望 上終不許汝立素有跋扈之志及挫折

甚其叛謀益肆廼假托講學招聚無賴武士  
僧徒雜於其中見海西俗頑曾有林巨正之  
亂求為黃海都事不遂與安岳人邊崇福朴  
延齡海州人池涵斗等潛相交結轉相誑誘  
應者近數百人汝立博通雜術知國家將有  
壬辰之變欲乘時猝起即與鄰邑諸武士公  
私賤隸壯勇人等作為大同契每月十五日  
約會射帙辦酒食以為樂先數十年天安私  
奴名吉三峯者勇猛絕倫為獷賊官軍每襲  
捕輒跳脫名聞國內汝立使涵斗等揚言於

海西曰吉三峯三山兄弟領神兵或入智異山或入鷄龍山又言鄭八龍神勇人當為王不久舉兵八龍即汝立幻彌而不知情者疑為別樣人於是海西行言藉藉以為湖南全州地富有聖人作興拯濟吾民自此國家太平無事愚民聞之眩惑喧傳汝立見事機頗洩決計作變乃陰部署約束期以是年冬末西南一時舉兵直犯京都海西九月山僧有相應者僧義嚴訶其狀密言于載寧郡守朴忠侃忠侃遲疑未敢發安岳校生趙球常稱

汝立弟子多聚徒衆飲醵踪跡不類平素郡  
守李軸掩捕問狀球知不可諱盡以逆狀發  
告軸以書招朴忠侃來會以信川郡守韓應  
寅名士可以取信朝廷乃以球詣信川聯名  
狀報于監司韓準狀啓上變是月初二日昏  
夜 上出御便殿命招三公六承旨入直都  
揔管二貳弘文館上下番與左右史入侍  
上問諸臣汝立何如人領相柳璥左相李山  
海對以不知其為人右相鄭彥信對曰但知  
其為讀書人不知其他也 上手擲其狀床

下曰讀書人所為乃若是乎使承旨讀之兇  
謀狼藉左右咸縮頸汗背大臣請分遣禁府  
都事逮捕汝立等併拿告者來柳典請分遣  
討捕使以備非常 上從之邊崇福一名涖  
勇健絕倫聞球告變自安岳奔告汝立四日  
而至金溝汝立乘夜逃脫都事柳湛翌日馳  
襲不獲都中震動 上親鞫逆黨汝立亡匿  
于鎮安山谷縣監閔仁伯搜捕得之汝立匿  
蔽田畔積草中官軍圍住汝立勢窮自殺追  
刑汝立屍于軍器寺前徒黨悉伏誅告廟頒

敕教書曰春秋著無將之義王法至嚴漢家  
重不道之誅罪人斯得茲當鯨鯢之戮合霈  
雷雨之施予以寡昧之資叨守艱大之業常  
臨兆載之淵谷庶囿萬姓於陶甄豈意逆賊  
之魁乃出縉紳之列賊臣鄭汝立惡甚梟獍  
毒逾蛇虺囊橐詩書有同莽賊之欺世譎張  
符讖敢蓄山童之陰謀罔念郊育之恩欲逞  
嘯聚之計乃與邊侯朴文長朴延齡金世謙  
李光秀李箕朴應逢方義信黃彥倫等相隨  
昏夜已涉歲年結沙門而聘妖假玉函而惑

衆布兇諱於都下謂武庫之可焚遣衛士於  
山中睨檀基以欲據矯旨以剪方伯戕閫帥  
分符而擣畿郊取江倉姦計益深禍機垂發  
擬殺本兵之長志欲何為將揮犯闕之戈事  
且叵測在從臣而居羣盜之首混冠裳而懷  
楔狗之心亂賊何代無未有甚於此者凡民  
罔不慙皆可得以誅之縱失悖曄之伏辜已  
快逆教之魁斬肆將汝立等凌遲處死籍沒  
家產其子女及緣坐之徒並論如律餘孽在  
輶者當隨服處決於戲天網不漏既正罔赦

之刑輿情共欣式舉維新之典○十一月

上下旨求言詞曰予以寡昧叨守丕基二十

二年于茲慄慄危懼若隕淵谷夙夜不敢荒

寧庶不負祖宗之重寄不幸今者逆賊鄭

汝立以經幄舊臣懷梟獍禍心談詩書而欺

世盜名作讖緯而眩人惑衆罔念殍育之恩

敢逞嘯聚之計乃與邊陲朴文長朴延齡金

世謙李光秀李箕朴應逢方義信黃彥倫等

謂關防可越謂京城可犯焚武庫取江倉計

無所不至噫前古叛逆之變亦有甚於此者

歟究厥所由罪實在予寡德有虧若何以修  
之國政有失若何以改之公私義理何能辨  
之是非曲直何能明之紀綱之板蕩者若何  
以振起百司之怠慢者若何以警惕下情若  
何以盡達風俗若何以歸厚請託若何以遏  
絕獄訟若何以辨決銓選不公何以矯之士  
習不義何以正之幽枉未雪而冤抑積歟貪  
風未革而廉恥喪歟賢愚雜進而名器紊歟  
用舍顛倒而公道廢歟抑黷獮施令之際有  
病民害治者歟雖切圖治之願未領致治之

要茲擴虛已之量乃下責躬之教凡我大小  
臣僚下至草野韋布其各敷心腹腎腸極言  
不諱交修不遠俾予一人庶無獲戾于上下  
於戲失德所以致寇茲故引咎而修省布誥  
將欲來諫敢不傾懷而採納惟爾政府體予  
至懷播告中外庶幾來匡直之言保若陞之  
緒○命放趙憲歸鄉先是憲竄吉州會逆獄  
起湖南儒生梁山濤上疏訟憲之寃言其預  
言汝立必叛有先見之忠言上曰當初竄  
謫非予本意可放釋○贈故執義李敬中為

吏曹參判 上教曰故執義李敬中曾為吏  
曹佐郎當逆魁盛有名稱知其為無狀極力  
排之不通清顯竟被論劾其先見之忠不下  
古人其追贈判書賜義謚以褒之臺官言其  
太過命止贈參判遣官致祭○先是高啟人  
吳希吉從學于鄭汝立一日聞汝立詆斥李  
珥成渾乃為長書列數汝立詭慝之狀曰自  
此希吉之跡當絕於門下矣至是其書在汝  
立文書中 上閱是而竒之及見全羅監司  
所上汝立門徒被囚文案有希吉名特命放

釋下教曰此必奇士予欲官之其令政府議  
啓大臣議如上教傳于吏曹曰高敞居忠  
義衛吳希吉當丁亥年間奸黨充斥邪說肆  
行李珥成渾為其所擠雖朝廷之上無有一  
人救珥渾而斥汝立者希吉乃能於此時貽  
書逆寇推尊珥渾斥其逆賊心術良用可嘉  
不可不褒相當職除授乃除叅奉進士鄭雲  
龍長城人也有鄉行縣監李啓設學教士邀  
雲龍為師長一日汝立移書於啓要得祭需  
徧及列邑啓曰吾與此人無一日之雅豈容

致書求索定數責微如上司彌令乎遂不答  
知雲龍與汝立相識以其書示之雲龍曰此  
人博學李潑兄弟亟稱之故一再見之矣近  
聞其居家處事多兇詭狀今見此書益驗不  
絕此人必有後禍遂以書並與李潑而絕之  
至是上搜得其書下教褒獎特拜王子師  
傳○命錄光國勲臣兩司及弘文館請上尊  
彌荅曰王堂與予講學今幾年矣尚未知予  
意乎今此之事只是承奉祖宗指揮初無  
片功可紀而至為過當之言有若真有大功

者然慚負天地貽譏後世非細事也設使萬  
一謂予稍有微勞亦不可為此不必為之事  
三代則已矣如漢高光武及我高皇帝再  
造區夏功莫與京未聞有稱號之舉惟唐德  
宗輩乃敢為之及其顛沛反為削號之不暇  
至今千載使人鼓掌而笑予雖不敏稍知書  
史亦安忍迫於羣言以負吾心哉玉堂諸儒  
宜悉此意斯速停止

**庚辰**

二十三年春二月廷臣連請上尊號上

不許久乃勉從上尊號曰正倫立極盛德弘

烈○上親祭宗廟禮曹判書黃廷或啓曰廟  
享奏樂只用國初詞臣所創定若干章而今  
則分侑于諸廟事功各異不相合着請一室  
各撰一章 上命廣議施行其後諸廟雖有  
撰進樂章樂工無協律者不能被諸管絃仍  
用舊文焉○三月以僉知黃允吉為通信使  
司成金誠一為副典籍許箴為從事官使日  
本與倭使平義智等同時發京

**辛卯**二十四年春三月通信使黃允吉等回自  
日本倭使平調信等偕來允吉馳啓情形以

為必有兵禍既復命上引見而問之允吉

對如前誠一曰臣則不見如許情形允吉張

皇論奏搖動人心甚乖事宜上問秀吉何

狀允吉言其目光爍爍似是膽智人也誠一

曰其目如鼠不足畏也蓋誠一憤允吉到彼

恒慟失體故言言相左如此○倭答書云日

本國關白奉書朝鮮國王閣下鴈書薰讀

卷舒冉三吾國六十餘州比年諸國分離亂

國綱廢世禮而不聽朝政故予不勝感激三

四年之間伐叛臣討賊徒及異域遠島悉歸

掌握竊諒余事蹟鄙陋小臣也雖然余當託胎之時慈母夢日輪入懷中相士曰日光所及無不照臨壯年必八表聞仁聲四海蒙威名者何其疑乎依此奇異作敵心自然摧滅戰必勝攻必取既天下大治撫育百姓矜憫孤寡故民富財足土貢萬倍千古矣本朝開闢以來朝政盛事洛陽壯麗莫如此日也人生一世不滿百齡焉鬱鬱久居此乎不屑國家之遠山河之隔欲一超直入大明國欲易吾朝風俗於四百餘州施帝都政化於億萬

斯年者在方寸中貴國先驅入朝依有遠慮  
無近憂者乎遠方小島在海中者後進輩不  
可作容許也予入大明之日將士卒望軍營  
則彌可修隣盟余願無他只願顯佳名於三  
國而已方物如目錄領納且至于管館國政  
之輩向日之輩皆改其入

易置官屬非  
前名號故也當召

分給餘在別書珍重保蓄不宣

未書天正十  
八年庚寅仲

冬日秀吉  
奉復書

誠一見書群悖慢嘗稱殿下而稱

閣下以所送禮幣為方物領納且一超直入

大明國貴國先驅等語是欲取大明而使

國為先驅也乃貽書玄蘇譬曉以大義云若  
不改此書吾有死而已不可持去玄蘇有書  
稱謝諉以撰書者失辭但改書殿下禮幣等  
字其他慢賚之辭託言此是入朝大明之意  
而不肯改誠一再三移書請改不從黃允吉  
許箴等以為蘇倭自釋其意如此不必相持  
久留誠一爭不能得遂還○閏月倭使平調  
信玄蘇等至京師上用備邊司議使黃允  
吉金誠一等私以酒饌往慰因從容問其國  
事鈎察情形玄蘇密語誠一曰中朝久絕日

本不通朝貢平秀吉以此心懷憤恥欲起兵  
端朝鮮若先為奏聞使貢路得通則必無事  
而日本之民亦免兵革之勞矣誠一等諭以  
大義不可蘇又曰昔高麗導元兵擊日本以  
此欲報怨於朝鮮勢所宜然其言漸悖誠一  
不敢復問由○夏四月 上御仁政殿接見  
平調信玄蘇等宴享如例始用臺啓停女樂  
上特加賜調信一爵曰古無此例而爾自前  
往來頗效恭順故特加禮待之調信拜謝○  
上御朝講諸臣將退 上謂大司憲尹斗壽

曰欲與大臣及備局諸宰臣密議倭情都憲  
有計慮雖非當預可無退遂以倭情奏聞  
天朝當否議之大臣以下皆難之斗壽曰事  
係上國機關甚重殿下至誠事大天日  
在上豈可隱諱臣意當直上聞為是李山海  
曰正恐奏聞後天朝反以我通信倭國為  
罪故也兵曹判書黃廷彧如斗壽議餘如山  
海言不決而罷後日更議上斷以奏聞為  
是大臣亦不敢貳○五月上御晝講副提  
學金晬進曰平秀吉乃狂悖一夫其言出於

恐動以此無實之言至於陳奏詎是事宜  
上顧黃廷或曰兵判意如何廷或曰晬之言  
大不然我國事天朝二百年忠動至矣今  
聞此言安可恬然不奏乎晬曰大義則固然  
但書契雖如此使臣三人所見不同豈非無  
實之証乎上曰設使三人言皆同萬無犯  
順之理書契若如此則猶當取以奏之或言  
必犯或言必不犯此不過所見之異耳大槩  
為臣子者聞犯上之言而安坐不言乎晬曰  
事有經權若知必犯則固當急急陳奏如未

得實狀而遽煩上奏以啓邊釁豈非可悔之  
甚者乎廷或曰此又不然國家多福使秀吉  
徒為大言而止則天朝與我國不害因此  
而防備若果如書契之辭而使天朝漠然  
不知猝致猾夏之辱則此時可得悔乎胙曰  
此皆設辭豈至於此上國福建一路與日本  
只隔一海商賈通行若我國陳奏則倭無不  
知之理既奏之後又無犯順之事則天朝  
必笑我無實倭國必致深怨愚臣之慮實在  
於此矣上曰福建果近於日本而商賈又

通則安知日本送我之書契已達於天朝乎設使秀吉果不犯順而書契已露則天朝問於我國曰日本約與爾國入寇而不奏何耶云爾則雖欲免引賊犯上之言得乎前日尹斗壽之言亦如此奏聞不可已也晬曰奏聞雖不可已至以日本師期分明上奏太似圭角矣上曰既以夷情奏聞則師期乃其實也何可沒之也晬曰明言師期實為未安且奏聞之事以為聞於何人耶若直舉通信之事則無乃難處乎上顧左承旨柳根

曰承旨意如何根曰臣意則大義所在不可  
不奏但一直奏則恐或難處從輕奏聞似  
當上顧修撰朴東賢曰經筵官之意如何  
東賢曰人臣既聞犯上之言奏聞之事不容  
他議若奏辭曲折則不可草草劃令大臣廣  
議處之為當上曰然明早招大臣議定大  
臣李山海柳成龍李陽元等啓曰伏見筵中  
啓辭金晬所憂雖出於慮事之周而既聞犯  
上之言安忍默默但其奏本措語若不十分  
斟酌則後日必有難處之患柳根從輕之說

頗有理至於日本書契所答之辭則以君臣  
大義明白拒絕而措辭之際亦不使狠怒蓋  
不惡而嚴者要當如是也 上從之於是廷  
議始定乃於賀節使金應南之行略具倭情  
稱以傳聞為咨文于禮部及應南入遼界一  
路譁言朝鮮謀導倭入犯待之頗異應南即  
答以為委奏倭情來華人喜聞延款如舊時  
漢人許儀後在日本密報倭情琉球國亦遣  
使特奏而獨我使未至朝廷大疑之國言喧  
藉閣老許國獨言吾曾使朝鮮知其不誠事

大必不與倭叛姑待之未幾而應南以咨文  
至羣疑稍釋矣○玄蘇等歸付荅書契曰使  
至獲審體中佳裕深慰深慰兩國相與信義  
交孚鯨波萬里聘問以時今又廢禮重修舊  
好益堅實萬世之福也所遺鞍馬器玩甲冑  
兵具名般甚夥製造亦精贈饋之誠復出尋  
常尤用感荷尤用感荷但奉前後二書辭旨  
張皇欲絜入上國而望吾國之為黨不知此  
言奚為而至哉自敝邦言之則語犯上國非  
可相較於文字之間而言之不酬亦非交隣

之義敢此暴露幸有以亮之惟我東國即殷  
太師箕子受封之舊也禮義之義見稱中華  
凡幾代矣逮我 皇朝混一區宇威德遠被  
薄海內外悉主悉臣無敢違拒貴國亦嘗航  
海納貢而達于京師況敝邦世守藩封執壤  
是恭侯度罔愆故中朝之待我也亦視同內  
服赴告必先患難相救有若家人父子之親  
者此貴國之所嘗聞亦天下之所共知也夫  
黨者偏陂反側之謂人臣有黨者天必殛之  
況舍 君父而黨隣國乎嗚呼伐國之間仁

者所恥聞況於君父之國乎敝邦之人素秉禮義知尊君父大倫大經賴而不墜今固不以私交之厚而易天賦之常也豈不較然乎竊料貴國今日之憤不過恥夫見擯之久禮義無所效關市不得通並立於萬國玉帛之列也貴國何不反求其故自盡其道而唯不臧之謀是依可謂不思之甚也二浦開路之事在先朝約誓已定堅如金石若以使价一時之少倦而輕改久立之成憲則彼此俱失之矣其可乎哉不腆土宜具在別幅天

時正熱只冀異序萬重不宣

黃廷或製

○平義智

又到釜山浦泊船不下招邊將言日本欲通  
大明若朝鮮為之奏聞則幸甚不然兩國將  
失和氣此乃大事故來告邊將以聞朝廷不  
答義智即還是後歲朝倭船不復至留館倭  
常有數十餘人而稍稍入歸至壬辰春而一  
館空矣○秋七月修築湖嶺城邑備邊司議  
倭長於水戰若登陸則便不利請專事陸地  
防守乃命湖嶺大邑城增築修備○八月遼  
東都司移咨我國具報倭情蓋因許儀後誣

奏也備邊司始決專使陳奏之議○冬十月  
遣陳奏使韓應寅等陳奏日本恐脅我國欲  
入寇大明等情且辨咨內流言之誣令僉知  
崔豈獻奏文甚委曲而不能悉陳通使荅問  
之事猶畏諱也應寅等入北京 帝出御皇  
極殿引使臣慰諭勤懇賞賚加厚降勅獎諭  
皇帝久不御朝外國使臣親承臨問前所未  
有也由是續遣申黠等謝恩令奏賊情比前  
加詳

國朝寶鑑卷之三



